

Luho a domina den parada di mucha na San Nicolas



ORANJESTAD(AAN):

Casi 2 ora y mey, - na algun lugar 2 ora y 15 minuut, y otro lugarnan poco mas largo - tabata duracion di e parada di carnaval di San Nicolas ayera tardi, cu tabata domina pa tanto su luho como su musica carnavalesco di bandanan musical, brassbandnan y Soundsystemnan.

PARTICIPANTENAN

Poco mas di mil mucha a participa den e parada aki y conteonan haci pa juradonan riba cantidad di participante di gruponan, a yega na mes total cu e inscripcionnan na SAC, pero cu gruponan presentando cu mas of cu menos mucha cu a inscribi.

Sinembargo, a resulta cu e total di participante finalmente a termina riba e mes cifra di 1030 participante. Den edicion di mañan DIARIO lo bini cu estadisticanan di e parada, pa por haci comparacionnan.

Locual a haci e parada largo no tabata e cantidad di participantenan di e 10 gruponan, sino e cantidad di poco mas di 50 roadpiece cu tabata tin den e parada aki, dunando e su splendor di luho.

MUSICA

Di e agrupacionnan musical, Los Duques a sobresali y tabata ser comenta tur caminda, tocando tur e roadmarchnan exitoso di e aña aki.


Na Dado momento por a kere cu ta QUASI tabata tocando su cancionnan, y pa haya sorpresa cu tabata Los Duques.

Quasi mes ta otro di e agru-

pacionnan musical cu a domina musicalmente den e parada, principalmente cu "Macamba King" manera Reinier Mulders a worde bautiza na Colegio Aruba.

"Huppelen" a resulta e cancion mas scucha durante e parada di ayera.

Masha bunita un biaha mas tabata e presentacion di Climax cu tur e cantantenan infantil y juvenil di roadmarch, cantando nan cancionnan den nan parada.



POLIS

No por keda sin kita sombre

pa polisnan cu a traha durante e parada di ayera, kendenan a sa di mantene henter e parada masha ordena, pero cu a ricibi bunita colaboracion di publico tambe cu a laga e ruta solamente pa participantenan.

Bunita tabata cu e parada di mucha por a termina ainda cu solo di manera cu mayoran por a busca nan yunan na final y haya nan mas facil.

Durante henter e ruta por a



ripa cu mirones a goza masha hopi y tabata comenta e bunita cu e parada a resulta.

SAN NICOLAS

San Nicolas Uni a presenta cu 200 mucha reparti den varios grupo, manera Fantasia di Cinta, Soca-softball, Paisnan di Africa y eclipse. Ningun tabata gruponan di luho, pero pa locual ta nan fantasia, Grupo Uni San Nicolas a presenta cu gruponan simpel y bunita den cual mayornan no mester a gasta dineral, pero cu e muchanan a goza un mundo di parada.

Esaki sinembargo tabata e prome paso pa por haya den futuro mas grupo den San Nicolas Uni, pa asina nan engrandece carnaval di nan distrito.

Di e grupo aki, no por keda sin duna un pabien tambe na Zodiac y BMW cu a duna un animacion fabuloso pa e muchanan.

Principalmente Zodiac a sorprende hopi hende pa nan nivel musical.

